


www.diarioaruba.com
The way business moves!
DIARIO
Online
 E Matutino di Aruba

Ministro di Finanzas y Obran Publico:

FIPA ta un di e funacionan cu lo tin mayor control riba inversionan di Gobierno

ORANJESTAD (AAN): E asina yama FIPA, Fundacion pa Inversion Publico Aruba, ta e resultado di diferente estudioonan realiza pa optimiza e inversionnan di Gobierno. A cuminsa mira e posibilidadnan pa bin cu un alternativa pa inversionnan gubernamental despues cu na añanan 90 Gobierno no por a hiba un maneho di inversion consistente y duradero debi na factornan manera entre otro, entradanan di Gobierno a keda atras compara cu crecimiento economico, ayudo financiero di Hulanda a baha y e posicion di liquidez di Gobierno tabata debil.

Debi na e falta di medionan di Gobierno pa inverti e calidad di nos infraestructura a keda atras pa cual Gobierno a tuma e decision di introduci FIPA mas pronto posibel y asina segura e fluho continuo di capital destina pa financiamiento di inversionnan publico.

FIPA ta un concepto relativamente nobo pa Aruba, pero cu na diferente pais ta worde utiliza caba, inclusive Aruba tin un ehempel di esaki, Monumenten Fonds.

FIPA lo ta un fundacion 100% di Gobierno pa cual motivo e propiedadnan cu lo cai bao di FIPA lo continua den man di pueblo y no lo worde traspasa pa un instancia priva. Intencion di e

traspaso di cierto edificionan di Gobierno pa e fundacion ta pa logra haya financiamiento riba mercado di capital, utilizando e edificionan aki como onderpand, den caso necesario. Un total di 28 edificio di Gobierno lo worde traspasa pa e fundacion.

Ministro di Finanzas y Obran Publico, dr. Tico Croes a enfatiza cu e fundacion aki mester conta cu e mayor control posibel, no solamente di e organismonan normal, pero tambe di otro. Pa e motivo aki FIPA lo consisti di un directiva cu ta conta cu 3 miembro:

Un miembro apunta pa Ministro di Finanzas, cual lo fungi como Presidente di e fundacion; un miembro apunta pa sector sindical; y un miembro apunta pa sector comercial. Intencion di por conta cu presencia di e sectornan comercial y sindical ta pa duna nan como representante di un porcentahe grandi di nos poblacion mayor participacion y specialmente un mayor control den e proceso di inversionnan publico.

Sector sindical y comercial lo eherce control riba e proceso aki, banda di e organismonan cu tin e funcion aki, manera Centrale Accountant Dienst, Algemene Rekenkamer y Parlamento. Ademas di esaki na momento cu FIPA mester haci un fianza sea local of

internacional, e fundacion mester pidi conseho di Banco Central.

Pa por tin un control y un maneho transparente di e inversionnan realiza of cu mester worde realiza, Gobierno lo traha y stipula un programa di inversion annual y multi annual. E ultimo aki lo conta pa e siguiente 5 añanan y mester contene e siguiente informacion: contenido di e programa di maneho di Gobierno riba cierto terenonan di prioridad; inventarisacion di tur proyectonan di inversion cu Gobierno tin intencion di entrega na fundacion FIPA pa aprobacion y finan-

ciamento y; un calculo di e gastonan di cada proyecto.

Di otro banda, e programa di inversion annual, cual ta Sali

for di e programa multi annual ta cubri e siguiente aña y mester contene entre otro, un inventarisacion di tur proyectonan di inversion cu Gobierno lo entrega den e siguiente aña na fundacion FIPA pa aprobacion y financiamiento; descripcion di tur e proyectonan y; un calculo di e gastonan di tur e proyectonan.

CAD y ARA lo tin un rol importante pa loke ta control financiero di e fundacion FIPA, pues nan lo tin na tur momento e acceso na e administracion di e fundacion. E resultado di e investigacionnan realiza door di e dos organismonan aki lo worde entrega na Ministro di Finanzas y Parlamento. Di e forma aki Gobierno lo garan-

tiza cu e fondonan di Fundacion FIPA lo worde usa na un forma eficiente y conforme nos leynan vigente.

Di otro banda fundacion FIPA lo mester raporta na Ministro di Finanzas y Parlamento cada tres luna tocante e progreso den ehecuacion di e proyectonan di inversion. Di e forma aki tanto Gobierno como Parlamento lo keda debidamente informa di e desaroyonan y eventual problemanan pa asina por contribui caminda ta necesario.

Tur e mecanismonan di control menciona aki ta forma parti integral di Fundacion FIPA, cual lo worde guia segun e siguiente puntonan di salida: transparencia, sencillez y eficiencia.